

FJALA E DEPUTETIT ENKELEJD ALIBEAJ

E ENJTE 28 KORRIK 2022

Zonja Kryetare e Kuvendit,

Prej 3 ditësh kam paraqitur kërkesën që seanca e sotme të zhvillohet me debat. Ju thatë pak më parë se kjo seancë do të zhvillohet pa debat. Ju jeni aty për të zbatuar Kushtetutën e Republikës së Shqipërisë dhe Rregulloren, sigurisht, të zbatoni dhe të vini në jetë të drejtën e deputetëve të parlamentit shqiptar për të folur.

Sot do të diskutohet shkarkimi dhe emërimi i ministrave. Ministrat nuk janë lojtarë të një ekipi basketbolli, ku mund të hiqet një mbrojtës e të vendoset një sulmues, por janë njerëz që marrin topin, i cili është fati i shqiptarëve. Ju sot nuk keni të drejtë t'u hiqni të drejtën deputetëve dhe shqiptarëve për të kuptuar se kush po i qeveris. Pse po ikin ata që qeverisnin deri dje (rrugë e mbarë u qoftë atje ku janë nisur, dhe pse po vijnë ata, që do të qeverisin sot e më tej? Zonjë, është e udhës që sot në këtë seancë t'u ktheni parlamentin deputetëve, t'u ktheni parlamentin shqiptarëve, të dëgjojmë, të diskutojmë dhe të shqyrtojmë aktet e para të Presidentit të ri të Republikës.

Më thirrët dje në pikë të mëngjesit e pataksuar për një kërkesë që iu kishte ardhur nga Autoriteti i Dosjeve. Ju pyeta: “Çfarë është kjo”? Ishte një kërkesë për iniciativë legislative. Thashë: “Shumë mirë, kështu duhet të ndodhë gjithmonë, sa herë që ka kërkesa për ndryshime ligjore”. Të them të drejtën, Autoriteti i Dosjeve nuk ka të drejtë të paraqesë një ndryshim ligjor, megjithatë duhet të jetë fillimi i një procedure të re, që çdo procedurë ligjore, çdo iniciativë ligjore, të diskutohet. Sot, për çështjen më të rëndësishme që ky parlament duhet të diskutojë, kontrollin e deputetëve të parlamentit ndaj qeverisë, ju na hiqni të drejtën e fjalës?! Pothuajse e dimë të gjithë që qeveria është private, por të bëhet parlamenti privat, juaji, është e patolerueshme.

Ju keni detyrimin sot që, të paktën, të drejtën e fjalës në parlament, t'jua jepni deputetëve, sepse shqiptarët janë ulur sot përpara televizionit për të kuptuar dhe për të parë çfarë ka

ndodhur, pse po ikën njëri dhe pse po vjen tjetra. Kjo është e drejta thelbësore dhe elementare e parlamentarizmit.

Zonjë, keni kërkesën të shkruar dhe të argumentuar. Jepini të drejtën parlamentit shqiptar të diskutojë për ndryshimet në qeveri. Faleminderit!